

Sprach O lieben Jünger mein/ Ihr solt allzeit wacker sein/  
Nichts auff Erden lieben mehr/ Den mich vnd all meine Lehr.

Die Welt wird euch vbel thun/ Anlegen viel spott vnd hohn/  
Umbjagen vnd sagen frey/ Das der Teuffel in euch sey.

Wenn man euch lästert vnd schmeht/ Meinendhalben schend  
vnd schlegt/ So seid fro/ denn ewer Lohn / Ist bereit für Gottes  
Thron.

Seht an ich bin Gottes Sohn/ Vnd hab allzeit wolgethan/  
Ich bin ja der allerbest/ Noch macht sie mirs trefflich fest.

Weil sie mich ein bösen Geist/ Ein arg vnd verführer heist/  
Vnd mir allzeit wider spricht/ Sie schenckets euch freylich nicht.

Jedoch fürchtet nicht ein Mann / Der nun den Leib tödten  
kan/ Sondern den ewigen Gott / Der macht zu verdammen hat.

Der probirt euch wie das Golt / Ist euch alls sein Kindern  
hold/ So jr bleibt in meiner Lehr / Verlest er euch nimmermehr.

Ich bin ewer/ ihr seid mein/ Wor ich bin da solt jr sein/ Wer  
euch plagt der plagt mein Aug/ Wehe den an jenem tag.

Ewer elend/ angst vnd pein / Wird euch dort ein Frewde  
sein/ Vnd die schand ein Preis vnd Ehr / Für allem Himlischen  
Heer.

Die Apostel namens an/ Vnd lehreten jederman / Wer dem  
Herrn nachfolgen wolt/ Das er des verwachten solt.

O Christe hilff deinem Volck/ Das dir von Herzen nach-  
folgt/ Vnd durch ein seligen Todt / Loß werd aller angst vnd  
noth.

Chri-